

1 San Pedro

Jacheuayama

¹ Atše Pedro, Jesucristbe ichmoná, quem tsbuanácha sentsabiamná chë cachëngbe luarentše ndoñe mondoyenëngbiamá, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiamá.

² Sëntsabiamná chë Bëngbe Bëtsá Bëngbe Taitá tojánabacacangbiamá, ntšamo cachá jamama yojanjuabnacá y ntšamo jopásama yojantatsëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tšëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tšabá chašmotsatsmënama, bacna soyënga abujauánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebotnama.

Bëngbe Bëtsábeñe jtsošbuáchiyëse vida jtsebomnana, atsebácanënga jtsemnama

³ Bëngbe Bëtsá y Bëngbe Utabná Jesucristbe Taitábioye matschuanga; cha puerta lastemado ínÿengaftaca yómnyeca, tojanma bënga tsëm juábnaca vida chamotsebomnama, bëngbioye bacna soyënga jabujauánase, Jesucristo

cháuatayenama tonjánmayeca. Chíyeca bēnga montsobena chábeñe jtsobátmanana sempre y n̄yetsca tescama, ndayá cha šochjátšatayama.

⁴ Ndayá bēnga šochjátšataycá ndoñe quenátsmēna jēftsopochócama opodena soyēnga, ndayá n̄yets tempo tšabe soyēnga. Y bēnga mondobátmana jóyēngacñama ndayá Bēngbe Bētsá chabe entšanga jatšatayama tojašebuachenacá, ndayá celoca bēngbiana cha yojtsin̄yena.

⁵ Chē soyēnga tšēngaftangbiana entsemna, Bēngbe Bētsábeñe šmošbuáchema; cha chabe obenánaca cmondán̄yena, tšēngaftanga játsebacama. Cha chca jamama ya tojaprontá y echanjín̄yan̄yiye, Cristo jésabama tempo chaojóshjango ora.

⁶ Chíyeca tšēngaftanga tša oyejuayēnga šmojtsemna, masque nderado jtseytana in̄ye ora, n̄yetsca padecena soyēnguiñe jasúfriase chašmuachnēnguama.

⁷ Mo chē castellanama jtsetatšēmbuama aíñe o ndoñe tšabe castellano tomnama iñiñe fjuchnēngcá, padecena soyēnguiñe tšabá chašmojachnēnguse, Bēngbe Bētsá echanjín̄yan̄yiye tšēngaftanga ndegombre taišmošbuáchema. Chē castellano pronto endbetsopochóca, masque chca, chana puerta endbetsámána. Y tšēngaftangbe ošbuáchiyana chē castellanama puerta más enduámána. Tšēngaftanga padecena soyēnguentšana bēts ošbuachiyánaca chašmojábocnēse, Jesucristo chaojésabo ora, entšanga mochanjin̄ye tšēngaftanga šmojtsomerecena chacmotsatacheuanama, más bētsētsanga y obenēnga chácmbiamama y uámanēngnaca.

8 Tšëngaftanga Jesucristo šmondbobonshana, y chábioye ndoñe chešmátaninye; masque mora cha ndoñe quešmatonyá, tšëngaftanga chábeñe šmontsošbuaché, y šmontsebmna canye puerte tšabe oyejuayana, y ntsachetšá chana yomnana ndoñe quešmátobena jayanama, tša bëtscá causa.

9 Chca oyejuayana tšëngaftanga šmontsebmna, er ndayá tšëngaftanga jtošošbuáchiyëse šmobatmancá, ya šmojtsosháchichana, chë Bëngbe Bëtsá tšëngaftanga jtsatsebacayana.

10 Bëngbe Bëtsabe juabna oyebuambnayënga ya imojanatsjendá y imojanguá jtsetatšëmbuama, ntšamo Bëngbe Bëtsá entšanga játsbecama, y tmojanoyebuambá ndayá Bëngbe Bëtsá tšëngaftanga jatsatayama, tšëngaftangbiana tšabe juabna cha yobómnayeca.

11 Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochnëngo ora, yojamna Cristo jasúfriama y ntšamo chentšana Bëngbe Bëtsá chábioye puerte bëtšá bochjábemama, Bëngbe Bëtsabe juabna oyebuambnayënga imojanjuabná y imojanatsjendá jtsetatšëmbuama chë soyënga yochjanopása ora, ndaye tempo y ntšamo chë tempo yochtsemnama.

12 Pero tempo Bëngbe Bëtsá chëngbioye tojaninyanýe, chca jtsamana ndoñe cachëngbe tšabiana yonjamnama, ndayá chca jtsamana yojamna tšëngaftangbe tšabiana. Chënga tmojanoyebuambá, ntšamo chë tšabe noticiënga oyebuambnayënga tšëngaftanga tcmojauyancá. Y chca tcmojáuyana chë Uamana Espíritbe obenánaca,

nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tšabá jinÿama, chënga chaósertama.

Bëngbe Bëtsá entsanga jtsachembuanana chabe entsangcá chamotsiyenama

¹³ Chíyeca, botamana jtsejuabnayëse tšabá jatrabájama, y cach tšëngaftanga jenomándama jtsobenëse, yejuana šmochtsobátmana, Bëngbe Bëtsá soyënga cmochjátšatayama tšëngaftangbe tšabiamama jtsejuabnayëse, Jesucristo quem luaroye yochjésabo ora.

¹⁴ Tšëngaftanga Bëngbe Bëtsabe básenga uaue-nanënga quetsomñecá, ndoñe šmattsiyena ntšamo cach tšëngaftangbe bacna juabnënga yomncá nÿe tšabá jtsomñama, ntšamo Bëngbe Bëtsábioye cabá nduabuatma ora šmonjanbomncá.

¹⁵ Chamna, šmochtsiyena mo chë Bëngbe Bëtsabe entsangcá, puerte tšabe entsangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna.

¹⁶ Er Bëngbe Bëtsabe uabemana palabrënguiñe mëntšá endayana: “Tšëngaftanga Bëngbe Bëtsabeñe uámanënga šmochtsemna, er atše uamaná sëndmëna ca.”

¹⁷ Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiamama nÿetscanga cachcá mondmëna. Chíyeca, ntšamo nÿetscanga tmojamama tšabá o ndoñe tšabá yontsemna ca cha yochjayana ora, cha chca echanjama nÿe ntšamo chënga tmojamcá jtsonÿayëse. “Taita ca” chábioye šmondbuyánayeca, quem luarentše šmochtsiyenëntscuana sempre

šmochtsejuabnaye cha nyetscangbiana más bētsá yomnama, chē šmojtsama sóyeca chca jtsinŷanŷnayēse.

¹⁸ Tšēngaftanga šmondētatsēmbo, Jesucristo, mo nda ínŷengbioye jātsebacama crocénana cuafjētsjajocá, tonjanóbana tšēngaftanga jātsebacama, chē nyetsca soyēnga nŷe bonamente jtsamēse oyenentsana, ntšamo jtsiyenama tšēngaftangbe bēts taitángbentsana šmojanatsjinŷcá. Cristo ndoñe checmatanatsebacá, yopodena jtsopochócama soyēnga jētsjájuae, mo crocénana o castellancá,

¹⁹ ndayá cachá jóbanēse, chabe uámana buiñe juabuáshanēse. Cristo chē ndocna bacna soye nd-bomná, tonjanóbana ora enjamna mo canŷe oveshatemcá, tondaye ndbemaná, ni tsengana nd-bomná, Bēngbe Bētsábioye jētschuayama altaroca obaná.

²⁰ Chama Bēngbe Bētsá Crístbeñe tojanjuabó y tbojanábuayana, cabá quem luare ndētsemna ora; pero quem tempo, Cristo entšángbeñe tonjábocna tšēngaftangbe tšabiana.

²¹ Crístbeyeca, tšēngaftanga šmondošbuaché Bēngbe Bētsábeñe, nda tonjanma Cristo cháuatayenama y puerta uamaná tbonjánbema. Mēntšá, ndábeñe tšēngaftanga šmošbuaché y šmobátmana, Bēngbe Bētsábeñe endmēna.

²² Tšēngaftanga šmojama ndocna bacna soyēnga ainaniñe ntsebomnama, Jesucrístbeyeca catšátangbioye ndegombre jtsababuánŷeshanama, er tšēngaftanga ntšamo ndegombre yomncá jtsamēse, Bēngbe Bētsá šmoyeunana. Chcasna, sempre nyets ainánaca nyetscanga

šmochtsenbobonshana.

²³ Bëngbe Bëtsá tojama tšëngaftanga tsëm vida chašmotsebomnama; pero tšëngaftanga tsëm vida šmontsebomna, ndoñe nÿe quem luarentša entšanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebomnama y chë palabra ndocna te queochaisopochóca.

²⁴ Ntšamo Bëngbe Bëtsabe uabemana palabrënguiñe endayanca:

Nÿetsca entšanga mondmëna mo shacuancá,
y chënga imobomna tšabe soyënga, endmëna mo
chë shacuanentša uantšefjushangacá.

Chë shácuana jtsanctana y chë uantšefjushangá
jtsatquécjanana;

entšanga cachcá, nÿets tempo quem luarentše
ndoñe quemochátiyena;

²⁵ pero Bëngbe Bëtsabe palabra nÿets tempo echan-
jesomñe ca —chiñe endayana.

Y chë palabra endmëna chë Jesucristbe tšabe noti-
ciënga, chë buayenánana ntšamo ínÿenga tcmo-
jabuayenacá.

2

¹ Chcáyecna, nÿetsca tescama šmochtsajbaná
nÿetsca bacna soyënga amana, ínÿengbioye
áingñayana, bacna entšanga chë ntšamo
ndegombre šmojuabnacá ndinÿinÿnayënga
ntsemnana, ínÿengbioye untšabošana, y
ínÿengbiamá uayátsenayana.

2 Mo cabá mora onýnana šešoncá, tša jtsebošana chabe mamabe létsiye, cachcá tšëngaftanga cmontsamna puerte jtsebošana nyets tempo Bëngbe Bëtsabe soyënga jtsebomnama, chë soyëngaca Jesucristbeñe corente chašmotsošbuáchema, y chca, atsebácanënga chašmotsemnama;

3 ntšamo Bëngbe Bëtsabe uabemana palabrënguiñe endayancá: “Tšëngaftanga šmojátatšëmbona Bëngbe Utabná puerte tšabia nyetscángaftaca yomnama ca.”

Cristo, chë mo aina ndëtsbecá endmëná

4 Bëngbe Utabnábioye šmochtobeconá, nda endmëna mo canye aina ndëtsbecá, ndëmuanýëse tojtsama entšanga tšabe vida chamotsebomnama. Báseftanga cha tmojtsaboté, mo ntšamo chë ndëtsbéngaca canye yebna tmojtsejebuana ora, luaroca tmojtsejajó ndëtsbecá; pero Bëngbe Bëtsá chábioye tbojuábuayana, y chabe bominyiñe cha puerte uamaná endmëna.

5 Chábioye šmochtobeconá, tšëngaftanga chë tšabe vida šmojóyëngacñënga, cánýiñe mo aina ndëtsbéngcá, Bëngbe Bëtsabiana jajebuama canye yebnentšama chašmotsemnama; mo Bëngbe Bëtsabiana bachnangcá chašmotsemnama, nye Bëngbe Bëtsábioye jtsešervénama jtsentšënëse, chábioye jtsatschuanayama. Ntšamo Bëngbe Bëtsábioye jtsešervénama šmojtsamcá, chábioye tšabá jtsinýanana, ndayá Jesucristo tojanmama.

6 Chca ndegombre endmëna, er Bëngbe Bëtsabe uabemana palabrënguiñe, Bëngbe Bëtsá Jesucristbiana mëntsá tojánayana:

Smochjinÿe, atše sënjama Jerusalenentše canÿa chaotsemna,
y cha endmëna mo chë canÿe yebna jajebuámentše
chë más bëts uashacuanësentše jajona
ndëtsbecá.

Cha atšbe Uabuayaná endmëna, y atšbiana puerte
enduámana.

Nda chábeñe tojtsošbuaché, ndocna te nÿe bona-
mente chábeñe queochátobatmana ca.

⁷ Tšëngaftanga, chábeñe ošbuáchiÿëngbiana, nda
endmëna mo chë yebna jajebuámentše más bëts
uashacuanësentše jajona ndëtsbecá, cha puerte
enduámana; pero chábeñe ndošbuáchiÿëngbiamna,
entsopasana ntšamo Bëngbe Bëtsabe uabemana
palabrënguiñe Cristbiana endayancá:

Chë yebna jebuanënga tmontsanaboté ndëtsbé,
mora chë más bëts uashacuanësentše entsejájona
ca.

⁸ Inÿoca, Bëngbe Bëtsabe uabemana palabrënguiñe
mëntšánaca chabiana endayana:

Cha endmëna mo ndëtsbé ndayentše
jtsojestjiyamcá;

y mo peñëscá yomna chënga chamotsótsatšama ca.
Chënga Jesucristo jtsabotena, chabe buayenánana
ndoñe ntjoyeunaycá; Bëngbe Bëtsá cabá chca
ndopása ora tojanjuabó chca chaotsemnama.

⁹ Pero tšëngaftanga šmondmëna Bëngbe
Bëtsábeyeca bocacánënga, y mo canÿe rey
tmojtserverna bachnangcá, y šmondmëna
Bëngbe Bëtsabe entšanga nÿe chabiana
jtsetrabájayama, y chë nÿe Bëngbe Bëtsábenga
šmomnënga. Ý chca endmëna, tšëngaftanga
chë bëts soyënga ntšamo Bëngbe Bëtsá tojamcá

chašmotsabuayiynama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnayeşe y jtsamëşe, cháftaca jtsemnama chašmotsobenama, chë tšëngaftangbe juabnënga puerte binÿnayáftaca.

¹⁰ Tempo tšëngaftanga ni mo cánÿentša entsangcá ndoñe quešmënjatsmëna, nÿe ujquëshenënga; pero mora, Bëngbe Bëtsabe entsanga šmontsemna; tempo šmonjamna entsanga ndocná tonjánalastemanga, pero mora, Bëngbe Bëtsá aíñe lastemado tšëngaftangaftaca entsemna.

Bëngbe Bëtsá jtsešervénama jtsiyenana

¹¹ Atšbe bonshánënga, ndayentše tšëngaftangbe ndegombre luare yomna, celoca endmëna, y muentše quem luarentše, tšëngaftanga šmondmëna mo ínÿoicana ashjajnëngcá, y mo canÿe luarëjana nÿe achnejuanëngcá, cach tšëngaftangbe luaroye átayiñe. Chíyeca cbontsaimpadana, ndoñe chašmondëtsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsepenzéntsiayana, chentše jtsemándayama y Uámana Espíritu ndoñe chaondëtsemándama.

¹² Chë Bëngbe Bëtsábioye nduabuatomëngbeñe sempre šmochtsiyena tšabá jtsamëşe; chca chënga, masque mora tšëngaftangbe contra imojtsoyebuambná, tšëngaftanga mo bacá uamana entsanga cuaftsemnëngcá, chë tšabe soyënga ntšamo tšëngaftanga šmojtsamcá chamuinÿyama, y chca, Bëngbe Bëtsá chëngbioye chaojenonÿinÿé te, chábioye chënga chamotsatschuanama.

13 Běngbe Bětsá šmoyeunanama, nŷetsca entšanga mando bomnėngbioye šmochtsobedecena; chė Romoca bėts mandádbioye, cha chė quem luarentša más uámana puesto jtsemádayama endbómnyeca;

14 y chė tšėngaftangbeñe mandadėngbióynaca, ndėmuanŷenga cha jíchamuana chė bacna soyėnga amėnga jácastigama, y chė tšabe soyėnga amėngbiama tšabá imojtsama ca chamuayanama.

15 Chė mando bomnėngbioye šmochtsobedecena, er Běngbe Bětsá endboše tšėngaftanga tšabe soyėnga chašmotsamama, chca, chė ndosertánėnga chė tšėngaftangbiama podesca ichámėnga, ntšamo ndegombre yomncá ntsetatsėmbcá, tondaye chamondėtsebomna tšėngaftangbe contra jayanama.

16 Smochtsiyena tšabá jtsamėse, mo chė ya ndoñe más bacna soyėngaca y bacna juabnėngaca ndėmandanėngcá; pero chca šmojtsemnama ndoñe šmattsejuabnaye nŷe ndaye bacna soye jamama šmojtsobena ca, y nŷe chca šmochjátama. Más tšabá endmėna jtsiyenana, mo chė Běngbe Bětsá imoservenėngcá.

17 Nŷetscangbiama respeto šmochtsebomna, chė Jesucrístbeyeca catšátangbioye šmochtsababuánŷeshana, sempre šmochtsiyena Běngbe Bětsabiama jtsejuabnayeše cha chė más bėtsá yomnama, y chė Romoca bėts mandado šmochtsertespetana.

Cristo chabe entšanga tojinŷanŷé ntšamo yomna jasúfriana

18 Tšëngaftanga, chë nyets tempo ínÿabiamama canÿe yebnentše oservénënga, tšëngaftangbe nduiñëngbioye šmochtsayaunana, puerte respeto chëngbiamama jtsebomnëse; y ndoñe nÿe chë tšábëngbioye y nÿe tšabá mandbomnëngbioye, ndayá chë bacá mandbomnëngbioynaca.

19 Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe tbondmëna, chca jamëse, Bëngbe Bëtsá corente tšabá jtsinÿanana.

20 Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinÿanana.

21 Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiamama tonjansufrí, y chca cha tcmonjaninÿanÿé, ntšamo jamama cmojtsamna, tšëngaftanga chca chašmotsamama.

22 Cristo ndocna te ndocna bacna soye chenáisema, ni ndocnábioye chebnaiseingñé.

23 Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtsëtsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nyetscanga tmojamama tšabá

o ndoñe tšabá yonjamna ca yochjayana ora, chca echanjama nýe ntšamo chënga tmojamcá jtsonyayëse.

²⁴ Cristo cruciñe tonjanóbana ora, cha tonjan-sufri chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnama, y bënga ntšamo Bëngbe Bëtsabe bominyiñe tšabá yomncá jtsamëse chamotsiyenama. Er Crístbioye chënga tmonjanlisiá chaóbanama y tonjansufri jobanëntscuana, y chca, bënga šonjanatsebacá.

²⁵ Er tšëngaftanga, tempo Bëngbe Bëtsábentšana bënoca šmonjamna, mo ótšena oveshëngcá; pero mora Cristbe benache šmojtishache, y cha cmontsanýena, mo oveshëngbe canýe abuajënyácá, y cha entsantješna tšëngaftanga tšabá chašmotsemnama.

3

Ntšamo iuamna chë bouamnëngbioye jtsiyenana

¹ Cachcá mo chë oservernëngcá, tšëngaftángnaca shémanga, tšëngaftangbe boyángbioye šmochtsayaunana, chca, chë Bëngbe Bëtsabe buayenana soyënguiñe ndošbuáchiye boyángbioye chašmobená jáyëñjanama, Jesucrístbeñe chamotsošbuáchema, ntšamo tšëngaftanga šmojtsiyenama. Ndoñe queochátsiyta chë buayenánama chënga jatëtsëtsnayana,

² er chënga mochanjinýe tšëngaftanga šmojtsiyena, Bëngbe Bëtsá nyëtscangbiana más

bëtsá yomnama sempre jtsejuabnayëse, y ntšamo šmojtsamcá chca yojtsinÿinÿnáyeca.

³ Cach tšëngaftangbiana ndoñe mëntsá šmattsejuabnaye: “Entšanga atše botamaná tsmëna ca chamotsejuabnama atše nÿa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjo ca”;

⁴ ndayá chca chaotsemna, ntšamo tšëngaftanga chë Uámana Espíritbeyeca mandánënga jtsemnëse ainaniñe šmojuabnama, cmëbionama y šmobošama; ndocna te ndopochócaye botamanana jtsebomnama, ainaniñe nÿe cach tšëngaftanga uámanënga jenobiamama juabnënga ntsebomncá, pero aíñe ainaniñe tšabe ebionana jtsebomnëse. Chë soyënga Bëngbe Bëtsabe bominiñe puerte enduámana.

⁵ Tempo chca, chë puerte tšabe shembásenga, chë Bëngbe Bëtsabe bocacanënguentsënga, imojanama jtenóbotamayana; chënga Bëngbe Bëtsábeñe imojtsanošbuaché y chábeñe imojanobátmana, y nÿetscanga chëngbe boyángbioye imojánayaunana.

⁶ Chca yojamna Sara, Abrahámbioye ibnayeunana y chábioye “Taita ca” ibojanábobuatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmontsebomnëse.

⁷ Cachcá, tšëngaftanga boyanga, cada ona cachabe shémaftaca chaotsiyena, tšabá jtseñeyeanëse, y cha respeto buajoná chaotsemnama jtsamëse; pero chca, ndoñe nÿe cha acbiana más batšá obenana bomná bëtsemnama, ndayá Bëngbe Bëtsá chabiana

tšabe juabna yobómnyayeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Běngbe Bětsáftaca jencuéntama totcá chaondětsemnama.

*Chě tšabe soyěnga amama jasúfriama
yojtsamněnga*

⁸ Y morna, nyetsca tšěngaftanga cachcá šmochtsejuabnaye, ín्यenga šmochtsalastemana, chě Jesucristbeyeca catšátangbioye šmochtsababuán्यeshana, ín्यengbiana chacmóngmiaye, y cada ona chaotsejuabná chě ín्यenga chabiana más uámaněnga imomna ca.

⁹ In्यenga tšěngaftangbiana ntšamo tcmo-jaborlá ora, ndoñe šmattěchenanguaye; ni chacmojtsěyanguá ora, chěngbioye ndoñe šmattoyánguango. Chca játamama cuentna, Běngbe Bětsá šmochjaimpáda, chěngbeñe tšabe bendicioněnga chaotsemnama cha chaomama, er Běngbe Bětsá tcmojáchembo chca chašmotsamama, y Běngbe Bětsábiocana tšabe bendicioněnga chašmosháchiñama.

¹⁰ Ntšamo Běngbe Bětsabe uabemana palabrěnguiñe endayancá:

Nda toboše tšabe vida jěftsebomnama y puerte oye-juayá tempěnga jtsebomnama,

yejuana chaochtsenojuabná bacna soyěngama ndoñe chaondětsóyebuambnama,

y ndoñe chaondětsebosterama.

¹¹ Bacna soyěnguentsana chaotsojuánañe y tšabe soyěnga chaotsama,

natjěmbana n̄jetscángaftaca jtsiyenama chaotseboše, y chca chaotsemnama sempre chaot-sentšena.

12 Chca bontsemna jamana, er Běngbe Utabná, chabe bominyĩne tšabe soyěnga aměngbioye jtsan̄yenana, chěngbiana sempre jtsantješněse;

y sempre chěngbioye jtsayaunanana, chábioye ndayámna tmojtsotjanañe ora;

pero chě bacna soyěnga jamana uamaněngbe contra cha jtsemnana ca —chiñe endayana.

13 ¿Nda nanjobenaye tšěngaftangbiana bacna soyěnga jamama, tšěngaftanga chě tšabe soyěnga jamama sempre šmojtsentšěněse?

14 Pero masque tšěngaftanga cmojtsamna jasúfriama tšabe soyěnga šmojtsamama, Běngbe Bětsá chama tšabe soyěnga cmochántatšataye. Chě tšěngaftanga chašmosufrima aměngbiana ndoñe matauatjěngana, ni ainana tsetšenáněnga ndoñe matsmēnēngana,

15 ndayá ainaniñe sempre šmochtsejuabnaye Cristbiana mo Běngbe Utabnacá y chabiana respeto šmochtsebomna; y sempre šmochtseprontana jojuama nděmuan̄yenga tcmojtsatjaná ndáyeca tšěngaftanga Běngbe Bětsábeñe jtsošbuáchiyěse, chabiana ainaniñe šmobátmanama.

16 Pero chca šmochjama tšabe ainánaca jtsěnyayěse y Běngbe Bětsabiana respeto jtsebomněse. Smochtsiyena tšabá jtsaměse, y chama ainaniñe ndoñe chašmondětsebomna juabnēnga y chamuayana chca ndegombre ndoñe tšabá šmontsama ca, chca, in̄yenga

tšëngaftangbiana podesca chamojtsoyebuambná ora, tšëngaftanga Crístbeñe ošbuáchiyënga quetsomñecá tšabe soyënga šmojtsamama, chënga chamotsëuatja chca tmojtsóyebuambnama.

¹⁷ Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnama tojtsebošëse, y ndoñe chë jasúfriana ndaye bacna soye tcojamama.

¹⁸ Er Cristo nÿe canÿe tonjanóbana bënga bacna soyëngama jáperdonama; chë nÿetsca soyënguiñe tšabá amá, chë Bëngbe Bëtsabe bominÿiñe ndoñe tšabá yondmëna soyënga amëngbiana, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnama.

¹⁹ Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tšabe entšanga imonjamnëngbe espíritënga utámenënga imojamnoye, chëngbiana castigo tojtsemnëntscuana; y cha tojanayénjanama chënga tojanabuayená.

²⁰ Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquësha canduapormantscuana. Chentsana chë barquëshañe báseftanga tmojanotsbocá, posufta entšanga, búyeshe juatsbuacá chë barquësha yojtsámnayeca.

²¹ Chë chënga chamótsbocama tojanëjabuache béjaye, enjamna mo chë mora jenábayama

buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiama, ndayá bëngbe ainaniñe ndocna bacna juabnënga ntsebomnana Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca.

²² Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá angelëngbiana y espíritënga mando y obenana bomnëngbiana.

4

Entšanga entsamna jtsiyenana ntšamo Bëngbe Bëtsá yobošcá

¹ Chcasna, ntšamo Cristo tojansufricá, chabe cuerpiñe mo entšacá játssetšenëse, tšëngaftángnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe,

² chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nÿe entšangbe bacna juabnëngaca, nÿe quem luarentše tšabá jëftsemnana.

³ Tempo, bayté enjamna, ndayëntscuana tšëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nÿa ndoñe más. Chë tempo, tšëngaftanga šmonjaniyena nÿetsca bacna soyënga jtsamëse, jenomándama ntšobencá; tšëngaftanga šmonjánama soyënga nÿe ntšamo šmojanbošcá, nÿe tšëngaftanga tšabá

jtsomñama; šmonjanamana jotmenangana y ba fiestënga jtsebomnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama.

⁴ Morna, chë Bëngbe Bëtsábioye nduabuátmënga montsenjnaná, tšëngaftanga ya ndoñe más bacna soyënga jtsamëse šmojtsiyenama, ntšamo tempo šmonjaniyena, ntšamo chënga jtsamëse mondoyena, jenomándama ntšobencá; y chë causa, chënga bacna soyënga tšëngaftangbiana jtsóyebuambnayana.

⁵ Pero chënga echanjótocaye jayanama ndáyeca chca tmojamama, chë entsangbiana, chë ainënga y chë ya mochjóbanëngbiana, ntšamo tmojamama, aíñe o ndoñe tšabá bëtsemnama jayanama entseprontanabe delante.

⁶ Chíyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿënga chë tšabe noticiëngama chëngbioye monjanabuayiyná, chënga chamobenama chë nÿetsca tescama yomna tšabe vida chëngbe espíroftaca jtsebomnama, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nÿetsca entsanga yojtsamna jóbanama ca.

⁷ Ndoñe bayté y nÿetsca soyënga echanjopochóca. Chíyeca, tšëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuéntama chašmotsobenama.

⁸ Nÿetsca soyëngama, masna, sempre nÿetscanga puerte šmochtsenbobonshana, er

nda ínÿenga puerte tojtsababuanÿeshaná, sempre jtseprontánana ínÿenga jáperdonama, chëngbiana bacna soyënga tmojamama.

⁹ Nÿetscanga šmochtsamana tšëngaftangbe yebniñe jenofjana, chca jamama totcá yojtsemna ntjatichamcá.

¹⁰ Nÿetsca tšëngaftanga Bëngbe Bëtsá tcmojatšatá obenana tšabe soyënga jamama; chca, chë obenánaca cmontsamna jtsamana soyënga chë ínÿengbe tšabiana, chë Bëngbe Bëtsá cmojatšatá nÿets obenánaca ínÿengbioye jujabuáchama, nÿets tempo tšabe soyënga jtsamëse.

¹¹ Nda tojtsabuayiyná, Bëngbe Bëtsabe palabra chaotsabuayiyná mo Bëngbe Bëtsá chabijana cuaftsoyebuambnacá; nda ínÿenga tojtsaserverna, chca chaotsama chë Bëngbe Bëtsá yojtsama cha chaotsebomnama obenánaca. Nÿetsca soyënga ntšamo šmojtsamcá chaotsinÿanÿná Bëngbe Bëtsá puerte uamaná y obená bétsemnama, Jesucrístbeyeca. Chca šmochtsama, er Bëngbe Bëtsá puerte uamaná endmëna y obenana endbomna nÿets tempo y nÿetsca tescama. Chca chaotsemna.

Puerte tšabá endmëna, Crístbeñe tcošbuáchema, jasúfriama tbojtsemnëse

¹² Atšbe bonshana entsanga, ndoñe šmattsenjanaye padecena soyënguiñe šmojtsesufrínama; chiñe jtsinÿnana ntsachetšá ošbuáchiyana šmobomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachnëjuanana ca;

¹³ chamna, šmochjóyejuaye chë ntšamo Cristo tojansufricá šmojtsesufrina ora,

chca, Cristo corente obenánaca y uamanacá entsángbeñe chaojtonýná te, tsëngaftanga puerte chašmotsóyejuama.

14 Puerte šmochtsóyejuaye, nderado nda tcmojoyánguango Cristbiamá bétso servernayeca, er Bëngbe Bëtsabe Espíritu, chë corente bëtásá endmëná, sempre tsëngaftangbe ainaniñe iuétsemna.

15 Tsëngaftanguentše ndocná chabondëtsemna jasúfriama inýa óbanaye causa, atbëbanama, bacna soyënga ínýengbiamá amama, o ínýengbe soyënguiñe ontremeténama.

16 Pero Cristbe ustoná tomnama tojasufrí, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Cristbe ustoná bëtsemnama.

17 Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiamá, chabe entsangbiamá, tsábá o ndoñe tsábá tmonjamama. Cha chca bëngbiamá jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiamá chca chaojayana ora.

18 Y chca, chë Bëngbe Bëtsabe bominyiñe tsábá amabiamá ndoñe paselo atsbocaná jtsemnama tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca?

19 Chcasna, chë imosufrínëngaftaca Bëngbe Bëtsá chca yobóseyeca, entsamna chë tsabe soyënga jtsamana y Bëngbe Bëtsabe cucuatšične chëngbe espíritu chamoboshjona cha chaotsinýenama, er cha chënga tojánabiamá, y nyetsca soyënguiñe tsabe

palabra bomná cha endmëna.

5

Crístbeñe ošbuáchiyënga jábuayenama

¹ Y mora, chë tšëngaftangbentšë ošbuachiyëngcá enefjuanëngbeñe bëtsëjemëngcá amëndayënga chanjabuayená, atšë cach tšëngaftangcá bëtsëjema, canÿa ntšamo Cristo tonjansufricá tonjaninÿá y chama ínÿenga tonjanéyana, y canÿa ndábioye cach tšëngaftangcá Bëngbe Bëtsá bochjábema más uámana y bëtsá, Cristo entšángbeñe chaojtonÿná ora; tšëngaftanga chabuayená.

² Ošbuáchiyënga šmochtsanÿëna; chënga chašotsanÿënama Bëngbe Bëtsá chca tcmojábiana. Chca, chentša ošbuachiyëngbeñe šmochtsama ntšamo canÿe tšabe abuajëñÿa chabe oveshëngaftaca endbetsamcá. Bëngbe Bëtsabe trabajo ndoñe šmattsama, nÿe cmojtsétocanama, ndayá chca jamama šmojtsebóšeyeca. Chca ndoñe šmatjama nÿe paselo crocénana juácanama, ndayá ínÿengbioye jujabuáchama tša šmobóšeyeca.

³ Chë cmojtsamna jtsanÿënama ošbuáchiyënga ndoñe nÿe bëtscá šmattsamëndaye, mo chëngbe nduiñënga cuafjatsmënëngcá, ndayá ntšamo tšëngaftanga šmojtsiyenama, chënga šmochjínÿanÿiye ntšamo yojtsamna jtsiyenana.

⁴ Chca, chë bënga nÿetscanga, mo chë tšabe abuajëñÿacá šuanÿená, quem luaroye yochjésabo ora, mo canÿe uabuashinÿinÿana coronésha ndocna te tontsandbemëshacá, tšëngaftanga canÿe bëts uacanana soye šmochanjóyëngacñe, y chë soye endmëna nÿetsca tescama; Bëngbe

Bëtsá uámanënga y bëtsëtsanga cmochanjábiamá, cháftaca nyëts tempo oyejuayënga jtsemnëse.

⁵ Cachcá, tšëngaftanga chë bobontsëngnaca cbabuayená, sempre šmochtsejuabnaye chë bëtsëjëmënga tšëngaftangbe amëndayënga imomnama, y chca šmochtsama. Cada ona tšëngaftanguentsá bontsemna jtsejuabnayana chë ínÿenga tšëngaftangbiamá más uámanënga cuaftsemncá, ínÿengbioye šmojtsaserverna ora; er ntšamo Bëngbe Bëtsabe uabemana palabrënguñe endayancá:

Bëngbe Bëtsá chë nyë cachënga uámanënga tmojt-senobiamnangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tšabe juabna entse-bomna ca.

⁶ Sempre šmochtsejuabnaye Bëngbe Bëtsá chë más bëtsá nyëtscangbiamá yomnama, y nyëts mando y obenana bomná yomnama, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chaojobuache ora.

⁷ Nyëtsca soyënga ndayama šmuenócochinÿenama Bëngbe Bëtsabe cucuatšinë šmochjáboshjona, er cha tšëngaftanga yejuana cmondánÿena.

⁸ Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canÿe león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama.

⁹ Puerte šmochtomorócha, Jesucristbeñe bëtscá jtsošbuáchiyëse, chë uayayá tondaye

chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nyets luarënguenache cachcá jasúfriama yojtsamnama jtsetatšëmbëse.

¹⁰ Pero tšëngaftanga baseftayté chašmojasufri chentšana, Bëngbe Bëtsá cmochanjábiana nyetsca soyënguiñe puerte tšábenga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnama; Bëngbe Bëtsá, chë bëngbiana tšabe juabna bomná, bënga nyetsca tšabe soyënga šonjatšatá, y nda bënga šojáchembo nyetsca tescama bëtsëtsanga jtsemnama, chca echanjama.

¹¹ Cha nyets obenana nyets tempo y nyetsca tescama chaotsebomna. Chca chaotsemna.

Jtadiósoftanama

¹² Silvano, ndabiana sëndëjuabná atšbiana canye tšabe palabra bomná Jesucristbeyeca catšata yomnama, cháftaca quem base tsbuanácha tcbonjubuábiana. Atšë sëntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatsatnama. Chíyeca, sempre šmochjëftsiyena jtsamëse ntšamo chabe tšabe juabna tšëngaftangbiana yomncá.

¹³ Ošbuáchiyënga muentše átšeftaca montsemnënga cmontsacheuaná. Chënga quem bëts pueblentše mondoyena bacá uamana entšángaftaca, mo chë tempo, Babilonia bëts puebloca imojoyena entšangcá, pero Bëngbe

Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiana mo uaquiñacá endmëná, chánaca cmontsacheuaná.

¹⁴ Nÿetscanga Jesucristbeyeca catsatangcá šmochjenchuaye, jtenámochëse tša šmojtsenbobonshánama.

Atše, Bëngbe Bëtsá sëntseimpadana cha chaoma tšëngaftanga chë Jesucristoftaca cánÿiñe mo canÿacá šmomnënga, nÿetscanga ainaniñe tšabe ebionana chašmotsebofnama.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9